

SPERANSA

Un dia nobo a nase i ku un mente tolondrá
mi ta sali bai pafó djis pa buska un rayo tímido
di e solo hóben pa kenta mi alma friu
Mi kútis suak ta apsorbé e brisa fresku di mainta
i ku wowo nublá mi ta disfrutá di naturalesa
Riba drèmpi di mi mirada dos lagadishi ta hunga kore kue
Blachi baldadi ta balia pa loko riba ritmo di un para djispou
ku ta basha su kanto alegre sin tene kuenta ku mi doló.
Leu aya un arko íris ta reta mi pa kita bista fo'i paden
i gosa di e dia nobo
Su simpel grandesa ta sofoká mi i pone mi reflekshoná
Diripiente mi paden ta hincha, rechasá tur pesadia.
Ku humildat mi ta baha kabes i mi ta konsolá mi mes
ku kon kruek ku nochi a parse, ata tòg solo a sali su manisé



Poeta: Ena Neslo-Goede

Título di poema: Speransa

Edat: 75

Pais di residencia: Curaçao

Derecho di outor: Ena Neslo-Goede